



10. september 2021

UKA 2021/169
UPA 2022/169

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara.

Qanoq iliorluta nipilersortartut namminersortutut allatuulli akileraartarnikkut periarfissaat qulakkeerniarsinnaaneri pillugu apeqquteqaat aallaavigalugu oqallisissiaq.

(Inatsisartuni ilaasorta, Aqqalu C. Jerimiassen, Atassut)

Oqartoqartarpoq tamatta assigiimmik akileraartassasugut. Taamaattorli inatsisit malillugit nipilersortartut namminersortutut ingerlasut aqqissuisumut akiligassamik nassiussisinnaatitaanngillat. Soormitaavaana nipilersortartut namminersortutut allatuulli akiligassamik nassiussisinnaatitaanngitsut? Ajoraluartumik assigiimmik akileraartarnikkut nipilersortartut pineqanngillat.

Tunngavilersuutigineqarpoq nipilersortartunngooq akiitsoqarpallaalersinnaasut. Taava imaannerpa nipilersortartut allaniit namminersortuniit akisussaassuseqannginnerusut?

Aamma tunngavilersuutigineqarpoq namminersortutut akiligassamik nassiussisinnaalissagaluarpata akileraartarnermut aqutsisoqarfimmi pisarissersuutaavallaalissasoq. Namminersortutut inuussutissarsiuteqarusuttut pisarissersuutaasutut isigineqarpat?

Ullumikkut nipilersortartut tusarnaartitsiffigisaminni "sulisutut" akissarsitinneqartarput, akileraartitaareerlutik akissarsillutik. A-indkomstitullu nalunaarsorneqarlutik. Nipilersortartullu atortorissaarutinik pisanerminnut atatillugu akileraarutiminnut ilanngateqarusuttaraluarput. Taamaassinnaareeraluarput, kisianni taava ukioq naallugu tamakkiisumik akileraaqqaarlutik, selvangivelsimut aningaasartuutitik allattoqqaarlugit, ukiumut ataasiarlutik utertoortigisariaqartarput.

Nipilersortartut nammineq nipilersuutitik atortorissaarutitillu nassarlugit nipilersoriartarput. Massakutullu itsillugu assigiinnarpaa uagut allaffinni sulisartuusugut nammineerluta issiavimmik, nerrivimmik, qarasaasiamillu nassarluta suliarortartussaasuugutta. Taamaamat nipilersortartut allatuulli namminersortutut aningaasartuutiminnut ilanngateqarsinnaallutik ataavartumik akileraarsinnaatitaasussaagaluarput.

Oqartoqarporlu, tapiissuteqartarnikkut nipilersortartut taperserusunneqartut. Qujarupparpullu aamma taanna. Kisianni kikkut namminersortuusut tapiissutaannarnik ingerlataqarusuppat? Inuk aalisakkamik tunigaanni ulloq taanna uumassutigisinnaavaa. Aalisaammillu tunigaanni imminut



napatissinnaalissaaq. Nipilersortartooq tapiissutaannarmik tunerusupparput? Immaqaluunniit akileraartarnikkut namminersortutut allatuulli periarfissikkusupparput?

Nipilersortartut assigiinngitsorujussuupput. Ilai sunngiffimmi, ilai inuussutissarsiutitut. Ilai angerlarsimaffimmi, ilai tusarnaartitsivinni. Taamaammat akileraartarnermut inatsimmi sunngiffimminni nipilersortartut, kiisalu inuussutissarsiutigalugu nipilersortartunut tulluurtumik allannguinnissaaq. Imaangilarlu aalisartutuut piniartutuullu sunngiffimmi, inuussutissarsiutigalugu immikkoortinnialissagigut. Nipilersortartunut taamatut allagartalersuinissaaq tulluunngilaq.

Oqartoqassajunnarsivoq sooq nipilersortartuunnaat uani qaqqinneqarpat? Eqqumiitsulioriaatsimmi allat? Eqqumiitsulioriaatsit immikkut oqallisigisinnaasariaqarpat, imaangilarmi eqqumiitsuliornerummata ataatsikkut oqallisigiuartariaqarigut. Tamarmik immikkut atugaqarput, immikkullu ataqqinassuseqarlutik. Ataatsikkoortitsiniartuarneq eqqumiitsuliornermut appasissumik isiginnittariaasiuvoq. Massakkullu nipilersortartut atugaat uani eqqartorpagut.

Eqqumiitsuliorit assigiinngitsunik immikkut atugaqarput. Atuakkiortut atuakkiartik tuniniartarpaat. Eqqumiitsulioritooq qalipakkaminik, qiperukkaminik allanillu tuniniaasarpoq. Isiginnaartitsisartut isiginnaagassiorput, isiginnaagassiami atorfeqartitaallutik piffissami tassani. Filmilioritartut annertoorujussuarnik projekteqartarput assigiinngitsorpassuit suleqatigalugit, assigiinngitsuniillu aningaasaliisussarsiortarlutik. Nipilersortartut tamatigut assigiinngitsuni tusarnaartitsisarput, saqqummersitartik tuniniartarpaat, merchandisinillu tuniniaasarlutik.

Nipilersortartut atorfinitsinneqarpiarneq ajorput, isiginnaagassiami atorfinitsinneqarsimaneq eqqaassanngikkaanni. Nipilersortartut sumiiffinni assigiinngitsuni nipilersoqattaartarput, saqqummersitaminnik atisaminernillu merchandisenik tuniniaallutik. Nipilersortartut namminersortutut nalunaarsornikuusooq CVR. Nr.-qarluni nipilersorfigisimasaminut aqqissuisumut akiligassamik nassiussisinnaasariaqarpoq. Nipilersortartullu sinneri CPR-tik atuinnarlugit akileraaginnarlutik.

Oqartoqartarporlu soormi nipilersoqatigiit ataatsimut CVR-itaaginnarunik? Nipilersortartut allarpassuarnik nipilersoqateqartarput, nipilersoqatigiillu taarserartuurtarlutik. Taamaammat taanna periarfissaanngilaq.

Oqartoqarporlu nipilersortartut allatuulli aningaasartuutitik selvangivelsiminnut nalunaarutigiinnassavaat utertoortigalugillu. Ila namminersortut allat aamma taamatut oqarfigigaluarussigut assigissavaa? Aningaasartuutigisimasaminnut ukiumut ataasiaq akileraarutigisimasaminnut utertoornissartik utaqquiarlugu?

Akileraartarnikkut periarfissiinerusumik aqqiinnissaaq uani ujartorparput. Nipilersortartooq allatuulli akileraaruteqareerluni akissarsisoq, kiisalu nipilersortartooq namminersortooq allatuulli akiligassamik nassiussisinnaatitaasoq.